

RIJEČ UREDNIKA

Elmedin MURATBEGOVIĆ

Poštovani čitaoci,

Pred nama je prvi dvobroj časopisa Kriminalističke teme za 2011. godinu. Kao i u prethodnim brojevima, trudili smo se ostati aktuelni i nadasve profesionalni u odabiru zanimljivih, ali u svakom slučaju kvalitetnih naučnih i stručnih članaka. U ovom dvobroju imamo četiri članka koji, svaki na svoj način, problematiziraju i prikazuju aktuelne probleme iz oblasti savremene kriminalistike, forenzike, kriminologije i sigurnosnih studija u najširem smislu riječi. Prvi rad u ovom dvobroju govori o eksperimentalnom utvrđivanju starosti tragova papilarnih linija prstiju korištenjem reagensa SPR (Small Particle Reagent). Naime, starost tragova papilarnih linija pronađenih na mjestu izvršenja krivičnog djela predstavlja jedno od ključnih pitanja koje je prilikom istraživanja krivičnih djela potrebno utvrditi. Stoga i ovaj članak, predstavljen kroz izvorni eksperiment autora, predstavlja pokušaj djelomičnog razjašnjenja ovog pitanja kod izazivanja tragova papilarnih linija korištenjem reagensa SPR kao posebne metode. Drugi rad problematizira temu saobraćaja kao jednog od osnovnih problema savremenih urbanih sredina. U radu su obrađeni uzroci saobraćajnih nesreća na putevima Kantona Sarajevo. Korištenjem adekvatnog metodološkog instrumentarija u radu je prezentovano stanje sigurnosti saobraćaja iz ugla Uprave policije Ministarstva unutrašnjih poslova Kantona Sarajevo, odnosno njihove zvanične statistike. Autor je prikazao "snop" faktora koji dovode do saobraćajnih nesreća u Kantonu Sarajevo, predlažući sistemski rješenja za njihovo prevazilaženje u budućnosti. Naredni rad opisuje ontološku sigurnost u aktuelnim društvenim i političkim promjenama/procesima kroz ulogu žena u savremenom društvu. Opšte je poznata činjenica danas da postizanje izjednačavanja u pravima među polovima nije moguće ukoliko ne postoje od države formirane insitucije ili državni mehanizmi njihove zaštite. Upravo stoga, ovaj interesantni članak leži na platformi naučnog istraživanja o primjeni Zakona o ravnopravnosti spolova u Bosni i Hercegovini (u periodu od 1. juna do 1. septembra 2010. godine) u policijskim strukturama ili u ministarstvima unutrašnjih poslova u Federaciji Bosne i Hercegovine. Na kraju, imamo rad koji se tiče problema odnosa između javnog i privatnog partnerstva u oblasti sigurnosti u Bosni i Hercegovini. Ova tema je zasigurno jedan



II	<i>Kriminalističke teme</i> Časopis za kriminalistiku, kriminologiju i sigurnosne studije Godište XI, Broj 1-1, 2011. ISSN 1512-5505
----	--

od segmenata koji je najmanje zastupljen, te nikako istražen u samoj dinamici dosadašnjih reformskih procesa sistema sigurnosti Bosne i Hercegovine, ali i zemalja bližeg okruženja. Stoga nas raduje da u našem časopisu imamo priliku objaviti jedan ovakav članak. Autor u svom radu daje pregled stanja dosadašnjih pokušaja uspostave adekvatnog koncepta javno-privatnog partnerstva u oblasti sigurnosti, te ukazuje na neophodnost ozbiljnog analitičkog i profesionalnog pristupa u definisanju odnosa u pomenutim sektorima.

Nadamo se da će i ovaj broj, kao i prethodni, privući pažnju stručne ali i šire javnosti i da ćemo u budućnosti imati sve više novih mladih autora. Samo ovakva budućnost nam može biti potvrda da smo na pravom putu.

S poštovanjem,

Sarajevo, 22. 11. 2011.

Murat begović Elmedin